

KRISTA
TANA
DANGLAM
NGAM




KRISTIAN THALAI

Kristian Thalal Pawl Chanchinbu thla tin chhuak

May
2015



Vol VI No. 3



Youth Recreation Centre (YRC)
Hnatlang

Laipuitlang Branch Khagaria Work Camp



Kristian Ṭhalai Pawl chanchinbu thla tin chhuak

1970-a chhuah ṭan ■ Kum 45-naa vawi 5-na ■ Chhuah tawh zat : 439

Editor :

T. Upa Lalmuanpuia

Joint Editors :

Pu C. Laldingliana

Upa K. Rorelkima

Pu V. Lalrinmawia

Pu Vanlalpeka

Manager :

Tv. R. Lalramnghaka

A lak man :

Kum khatah - Rs. 60.00

Copy khat - Rs. 5.00

Thu chhuah tûr nei chuan Editor, Kristian Ṭhalai, Synod Office-ah thawn tûr a ni a; a la duh chuan KṬP Office-ah a man pèk lâwk a ngai.

Office Phone : 9436142398

**E-mail : kristianthalai@yahoo.com
centralktp@gmail.com**

**Visit us :
cktp.blogspot.com
www.facebook.com/centralktp**

KRISTIAN ṬHALAI PAWL

Thupui

Rawngbawl tûra chhandam

Thupui inngahna

Ephesi 2:10 Thil ṭha ti atán Krista Isuaah chuan siama awmin, ama kutchhuak kan ni si a, chu thil ṭha tih chu kan awmna tûrin Pathianin a buatsaih lâwk a ni.

Thil tumte

1. Isua Krista rinna leh amah anna kawnga ṭhalaite hruai.
2. Kohhran kut ke ni tura ṭhalaite buatsaih.
3. Kohhran hnathawh tihpuitlin.
4. Krista Chanchin Ṭha puan darh.

A CHHUNGA THU AWM

1. Editorial	1
2. Vanglai hun	2
3. Khawvel chen dan ṭha	6
4. KṬP leh social media	9
5. Isuan thlemna hi engtin nge a thlir?	12
6. Laitpuitlang Branch Work Camp	16
7. Youth Recreation Centre	20
8. <i>Sunna</i>	23
9. <i>Hringlang tlang</i> – Pathianin min tidanglam	25
10. Rimawi – Kohhran Zaipawl	27
11. <i>Kantu</i> – Thingdawl Hmarveng	29
12. Keimahni	31



Harhna

Mizo Kristiante hi harhnain ñum eng emaw zat min nuai ta. Kum 1906, 1913, 1919, 1930 & 1984-ahte khan ram pum huapin harhna kan chang taroh a. Chu vang chuan kan ram kohhran hi harhnain a hrin chhuah leh a charom len a ni, kan ti thei aom e. Harhna chanchin tel lo chuan kohhran chanchin hi a sawi theih loh tluk a ni a. Khawii hmunah emaw kan ro viau laiin khawii hmunah emaw harhna kan chang deuh reng barok. Harhna hi kohhranin kan hlawkpuiin ringtu mi mal nunah pawh hlawkna leh sawtna nasa tak min pe ñhin a. Ringtu nun a charok tho va, chau leh nguiten chakna thar an dawng a, chhandamna la chang loten Krista an hmuh phah ñhin. Chuvangin, harhna hi kohhran tan tha leh zung pawimaroh ber a ni a, harhna kan chan zel theih nan kohhran hi a inhawon deuh deuh a pawimaroh hle a ni.

Tunlai hian Kelkangah harhna a thleng mek a, Zoram chhung leh pawon atangin chhimtu tam tak an aom mek a. A chhimtute thlen chinah harhna hi a thleng zel ni pawhin a hriat bawok a ni. Mizoram harhna hmasa ber (1906) pawh kha a van tla ni lovin, Khasi ram harhna zuk chhimtuten Chaltlang Bethel hmuna an mamawh an dil chhanna a nih kha. Kelkang harhna thlen ñan tirh hi kum 2013 daih taroh kha a ni a. June 12, 2013 atang khan chatlak aom lovin tun thlengin zan tin an la inkhawm mar pat niin sawi a ni a, a ropui hle a ni.

Harhna chuan mi thinlung a tieng a, Krista thutakah a hruai lut ñhin. Chumi zarah chuan nun nei loten Kristaa nun thar an lo neih phah a, chak loten chakna an lo neih phah ñhin a ni. Mi tam tak, harhna chang intite hian mi sual harw tarok velin harhna kan chang em aw? Pathian chuan sual hi a harw reng a; nimahsela, mi sual erawh chu a hmangaih a ni. Harhna kan chan hian mi sual min huattir a nih chuan Krista thutaka harhna kan la chang lo tihna a ni a, an nun sima Krista lam an harwi theihna tur kawongah kan hruai lo tihna a ni ang. Pentikos Nia harhna thleng kha chuan mi tam tak Krista chhandamna huangah a seng lut a ni.

**Pathian Thlarau Thianghlim, I êng vâr chhuak rawh se;
Rilrua thimte kiantirin, kan mit tivâr ang che.**



VANGLAI HUN

— Rev. Lalbiakvulmawia
i/c Mission Vengthlang Bial

Tin, i vanglai hian i siamtu hre reng rawh, ni ða lote a lo thlen hma leh, "Lawmna reng reng ka nei lo ve!" i tihna tur kumte a lo hnaih hma hian.
Thuhriltu 12:1

Kan ti dawn chauh emaw kan tih laiin kum 60 kan hnaih ta hle mai a. Kan senior zawkte sawi tura kan ngaih pension thu te kan sawi kan sawi ve ta mai. Hun hian min nghak lovin, tui lian anga min len lai hian hmanlai kan ti kan ti ve ta fo mai. A ni tak a, High School kan kal lai vel te leh College kan kal tirh te kha nimin mai emaw kan tih chhungin khua rei a chang zel dawn ta chu a ni a. Vawi khat chu kan school chawlh dawn farewell kan neih ðumin blackboard-ah lian takin 'KAN LA NGAI DAWN ASIN MAW KHUA REIAH' tih kan ziaak a, thla te kan lakpui a. A hun lai chuan engah kan ngai teh vak

lo. Mahse, tun hnuah chuan a lunglenthlak zo ta vek zawng a ni.

Vanglai nun hi a nuam a, mihring nun kan chen vanglai tak a ni. Chumi huna kan duhthlanna sang ber luahtu chu kan upat hun pawha min hruaitu a ni. Chumi hun chu sawi nuam kan tih lai leh kan sawi chàk lai tak pawh a ni. Thuhriltu ziaaktu hi upa lam a nih a rinawm a, thil eng kawng pawh hriatna ða taka lo hre chen tawh a ni ngei ang. A thlir kir aþanga mihring dinhmuna ða ber chu VANGLAI HUNA SIAMTU PATHIAN HRIAT RENG a ni. Thatlai huna Pathiana kan nun inpekna tak (Piantharna) kan neih loh chuan upat lamah chuan rilru a lo chawl tawh a. Eng pawh mai hi helhkam em em a awm tawh lo. Chuvangin, Pathian hriatna nunah hruai thuk kan har tawh

thin. Vawi khat chu ka vanglai hun zawng zawnga ka thin kawmngaih (hming tak pawha inko lo kan ni a), min ngai ve viau thintu, kei pawhin ka ngaih em em thin chu ka ngaihtuah chhuak a. Kei chu kohhran rawngbawlna lam (Pastor)-ah ka kal a; ani chu zirtirtu lamah, zu leh sa chenin a awm thung a. Nuam tihna ve vea kal kan ni a, kan inthen Chiang hle mai; hmuh pawh kan inhmuh ngai tawh lo. Kan awmna hmunte a lo dang tawh si; mahse, kan rilru ve veah kan inthlah lo. A vanduai asiamin ka thianpa chu cancer-in a na a ni tih min han hrilh chuan tlawh ngei ka tum ta a. Kan han inhmuh chu, kum 35 vel inhmuh tawh lo kan ni a. High school kan kal laia theirah kan lawhna hmun te sawi chhuakin, kan len dunna hmun hrang hrang te kan sawi dun chu kan lung a leng hle a ni. Mahse, Pathian hnaih tura a thinlung siam a harsa em em tawh mai. A lu dawmin ka'n tawngtai thin, a thlarau nun ka ngaihtuah avangin ka rilru a chaw lo. A thih hnua a ro a sem dan tur min ziahtir zan phei chuan mittui nen hun kan hmang dun a. Mi hmuh loh vah Pathian hmaa thingthia a

tawngtai kan hmu thut chuan mi va tilawm em! A ruang chungah te ka sawi chhuak hial a. Thatlai huna Pathian hriatna nung neih loh chuan kum upat hunah chuan a har tawh thin. Upat hnua Pathian kan hmu thei lo tihna chu a ni lo, kan Pathian hian a rawngbawl tur leh a hna thawhpui tur hian vanglai hun hmang laite zel a ko thin. Chu hun pawimawh luah mektu thalai rual hian hre Chiang ila aw! A va duhawm em!

C.C. Luther-a chuan, *"Thih chu hrehin ka lungngai lo, Chhandamtu'n min hruai vangin; Mahse, ruaka ka tawh tur hian min tihrehin ka lungngai,"* a ti a. *"Kum ral ta zawng zawngte kha aw, koh kir leh theih ni se la; ko kirin Chhandamtu hnenah lawm takin ka pe tawh ang,"* a ti leh a. A har tawh awm mang e. Inchrirna a neih hi chu a tha e; mahse, a beidawnthlak dan erawh hi chuan ngaihtuahna a tibuai viau mai. David Brainerd-a chuan, *"Aw, hun hi a va hlu tak em! Ka khawh ral thlawn hian min tina a, ka tih tur ka tih loh leh ka theihna ka lo hmang tlem khan min tihrehawm,"* a ti a. Carlyle-a chuan, *"Chatuan ngaihtuah tel loh chuan hun hman that theih*

a ni lo," a ti bawka. Washington Post chuan kum 1912 April ni 14- a Titanic lawnglian pil chhan kha 'minute thuma officer tlai vang a ni' a ti bawk. Vanglai hun hmang tha rawh le.

Vanglai hun tur kan hmaah a awm

Kan vanglai hun hlu kan hmaah a awm kan tih chu thil inhmeh vak a ni awm lo ve; mahse, a awm tlat si. Tirhkoh chuan, "*Kan pawn lam mihring hi lo awngrawp telh telh mah sela, kan chung lam mihring chu ni tin siam thar zelin a awm zawk a ni,*" (2 Kor. 4:16) a ti a. Tin, chu bakah, "*Kan hrehawm nep tak, tun mit khap kar chung chauhoa awm tur hian ropuina nasa tak chatuan atan min siamsak nasa tulh tulh a ni,*" (2 Kor. 4:17) a ti leh a. Aw! Chu hmunah chuan mi zawng zawng hi thalai an ni vek tawh ang. Thlanmual hmuh tur a awm tawh lo vang a, kum upa sawi tur an awm tawh lo vang. Ni eng leh khawnvar eng a ngai tawh lo va, min tihrehawm thintu natna, thihna, hlauhawm eng pawh a bo tawh ang. "*Tin, anchhia reng reng a awm tawh lo vang a, Pathian leh Beramno Lalhutphah chu a awm tawh zawk ang. Tin, zan a awm leh tawh lo*

vang a; Lalpa Pathian chuan anmahni a en dawn si a. Tichuan, chatuanin ro an rel ang" (Thup. 22:3,5). Tin, lui mawi tak pawh a luang ang a, lui kam tuakah chuan nunna thing, chi hrang sawm leh pahniha rah, thla kipa rah a awm a; chu thing hnahte chu hnam tin tihdamna tur a ni (Thup. 22:2). Tin, kan nun pawh a mawiin a ropui hle dawn a ni ang, Daniela buah chuan hetiang hian ziaak a ni a: "*Tin, a finge chu van eng angin an eng ang a, mi tam tak felnaa hawwi kirtirtute chu arsi angin kumkhaw tlaitluanin an eng ang'* (Dan. 12:3) a ti a. Kan Lal Isuan "*Mi felte chu an Pa ramah chuan ni angin an eng dawn a ni,*" a ti a (Mt. 13:43). A va ropui dawn em! He khawvel kan thatlai hun kan hmanna hmun hi Pathianin ni ruk chhunga a thil siam, "*Tha a ti hle a,*" a tihna hmun kha a ni a. He hmun, hun rei lo te chhunga a siamna hmun pawh kan kham lo, kan ngai, kan lung a leng, kan tih chuan chatuan hmun, kan Lalpa'n a buatsaih chu a va ropui zual dawn em! Mahse, kan thiltih ang zel hian khitah khian kan leng ho dawn a ni si a.

Tin, chu hmuna fak hla an sakte chu a va ropui dawn em! John Newton-a chuan, *"Chutah kum sangsawm ral hnuin, ni êng mawi takah chuan, fakna hun tan ang a ni ang, chatuana zual zel tur,"* a ti daih mai. John Newton-a vek hian, *"Vanram ka thlen hunah chuan mak tih em em 3 ka nei ang: 1) Hmuh ka rin loh tam tak ka hmu ang; 2) Hmuh ka rin tam tak ka hmu lo vang; 3) Keimah ka inhmu tur hi a mak ka ti tawp thei lo vang,"* a ti a. Standford-a chuan, *"Vanrama kan awm hmam keimahniah vanram a awm hmasak a ngai a ni,"* a ti a. Kan chhut ngun a ngai khawp mai. He kan that lai nun, kan dam hun chhung ngei hian vanram chu kan hnenah a thlen a ngai a. Kan Lal Isuan, *"Pathian ram chu in zingah a awm a ni,"* (Lk. 17:21) a ti si a. Tunlai khawvelah ropuina kan um a, mi fak leh chawimawi chakin kan tuihal a; kan zo lovin kan tlukpui bawka. Khawvel mi ropui leh hmingthang, vanglai huna thil ti thei tak takte hi chatuan vanglai hun hlu zawk an thlen hmaa zuihral ta mai mai te an awm. Entir nan, hetiang hian han sawi ila: Alexander Ropuia'n khawvel a hneha, lak

tur dang a neih tawh lohva a tah rikngawt lai khan naupang te asin a nih. Napoleon-a France lalber a nih khan kum 35 mi chauh asin a nih. Nathan Hale-a'n, *"Pawi ka tih ber chu kan ram tan nun pakhat chauh ka lo nei hi a ni,"* a tih lai khan kum 21 mi chauh a ni. Isaac Newton-a'n lei hipna a hmuhchhuah khan kum 24 mi chauh asin a nih. Tin, Thomas Jefferson-a Senate member atana thlan a nih khan kum bituk, 35 a pha lo va, amah avangin ram danpui bawh-chhiat a ngaih hial kha. Chutiang chuan kan tunlai hunah mi ropui leh lehkhathiam leh hman tlak tak tak lo chhuak mah ila, chatuan vanglai hunpui chatuana zual zel tur neih phawt a tul hmasa ber. I vanglai hian i Siamtu hre reng rawh. Pastor Chhawna chuan, *"Chu ram ka thlirin ka lung min len,"* a ti a. Chatuan khaw var tur kan vanglai nun hman hun tur thlirin lei nun ram hi i chen ang u. *'Thalaite u, in that lai chen ula.... Amaherawhchu, Pathianin in chungah ro a rel dawn tih hre reng ang che u'* (Thu. 11:9).

Lalpan a thu malsawm rawh se. Amen.

.....

Khawvel chen dan tha

– Rinfela Zadeng
G. Udayagiri, Odisha
(Zobawk Vengthlang Branch)

Thuhriltu 11:9,10:- “*Thalaite u, in that lai chen ula, in la naupan viau lai hian hlim rawh u; in thinlung duh zawng chu zawm ula, in mitin a hmuh châk zâwng nen chuan; amaherawhchu, chungah chuan Pathianin ro a rel dawn tih hre reng ang che u.*”

Thalaite khawvel

Khawvel hmasawnna leh changkanna lo thang zel hi nuam ti tak leh hlim taka chena, a nawmna tak tak pawh phatu chu kum upa lam tawhte ni lovin keini thalaite hi kan ni tih kan hre theuh awm e. Keini Kristian thalaite pawh hi khawvel chen tur kan ni a, kan chen pawh Pathianin a phal a ni tih Thuhriltu 11:9,11-ah Chiang takin kan hmu a. Mahse, Pathianin kan chungah ro a rel

dawn tih kan hriat reng erawh a ngai. Kan thalaipui khawvel nawmchennain a hruai mekte hi engtin nge kan chhanchhuah ang? Kristian thalaite'n khawvel kan chen dan tur chu eng nge ni ta ang? Heti ang hian hmun thumah then ta ila:

Lal Isua tel lovin

Nula tlangval niha mahni tawka hmeltha leh 'luck' nih ngat chuan LAL Isua tel lova khawvel chen hi a chakawm duh khawp ang. Setana hian chuti ang ti tur chuan thiam takin min lo thlem chamchi bawh thin.

Kan thalaipui tam tak chuan Lal Isua tel ve theih lohna hmunah nawmchenna an zawng ta chiah reng a. Lal Isua tel lovin an vanglai hun tawi te chu hmeichhiat mipatna, zu leh sa leh ruihlo tinreng nen an chen ta thin a. An tawpna chu over dose, AIDS, *adt.* a ni thin a, a va pawh tak em!

Nun beidawngin an awm a, an nun hlimna tak tak an

hmuh zawh loh avangin mahni intihhlum duhna rilru an pu a, mahni nunna ngei inlaksakin Setana'n a bum hlum ta thin a, a pawt takzet a ni. Hlima leh lawmna dik nia an hriat chuan beidawnna vawrtawpah a hruai lut a. Setana chuan an vanglai zawng zawng leh an thlarau nun thlengin a neihsak ta thin a, an khawngaihthlak takzet a ni.

Lal Isua nen

Lal Isua nena vanglai/ thatlai chen hi ngaihzawngte nena chen aiin hlu a, a tlo bawka ni tih hretu kan ni thei hi kan va vannei tehlul em! Lal Isua tel lova khawvel chentute chuan kum 10/20 emaw an chen chuan an taksa chu hmuh tlak loh khawpa chhia a ni tawh a. An thlarau nun phei chu beidawnna hlin a khat thin a ni.

Lal Isua nen erawh chuan kum 14-40 thlengin taksa leh thlarauvah malsawmna tam tak kan dawng a. Harsatna leh manganna kan tawh pawhin Lal Isua kan neih tlat avangin

kan thla a muanga, thihna kan tawh pawhin chatuan nunna neitu kan ni bawka si a, a va ropui em! Lalpa chu fakin awm rawh se.

Ni tin zan tin min veng a, nupui pasal tur tha tak tak min pe a. Sum leh paiah hausakna min vur loh pawhin thlarau lamah nun hausakna thurukin min vur thin a ni. Mite'n he khawvel ropuina leh hausakna chan/hloh anga min ngaiin, sum leh pai tam tak nei lo mah ila, vanah ro chhe thei lo khawl khawmtu kan ni si a. Kan va vannei tehlul em! Nun hlimna thuruk min pe a, rilru hahna nei miah lova zanah tui taka kan muhil bawrh bawrh thei te hi Lal Isua kan neih tlatna avanga kan hausakna leh kan hlimna thuruk chu a ni si a.

He khawvel natna khirh ber ber leh doctor-te tiham theih loh natna pawhin min tlakbuak mah se, chatuan nunna min petu Lal Isua nen chuan engkim kan ti thei a, kan natna zawng zawng pawh anin min tihdamsak thin a.

Kan taksa damna min pek loh chang pawhin kan thlarau damna min pe thin a, eng lai pawhin kan mamawhna apiangah min awmpuiin min chenchilh tlat zel a ni.

Missionary ni ve rawh

Lal Isua nena khawvel chen hi a hnawk lo va; hnawk chu sawi loh, a hlu em em zawk a ni tih hi kan thalaipui la hre ve lote hnenah thahnemngai takin i hrilh ang u. Lal Isua'n min hmangaihzia te, Lal Isua nen hian kan

thatlai hun hi a chen theihzia te hi hrilh sauh sauh ila, chu kawng chu thahnemngai takin i hrilh ang u.

Lal Isua nena khawvel chen hi khawvel chen dan tha ber leh hlu ber, chatuana nunna neihna a nih thu hi a hrilhtu leh kawhmuhtu, zirtirtu ni turin thahnem i ngai zual ang u. Hmusit leh endawng mai lovin, 'Missionary' rilru puin Lal Isua nena khawvel chen nawmzia i hrilh mawlh mawlh ang u♦



Eng nge i hmuh?

Sap hla puuah thiam hmingthang William Blake-a kha tuk khat chu tuifinriat kamah a leng vel a, tuifinriat fawn var suau suau chung a ni lo chhuak thlirin a ding vang vang a. Van boruak chu a eng phut mai a, rangkachak ang maiin ni zung chu mawi em emin tuifinriatah chuan a inkhawh lut sung mai a.

Chu zing ni chhuak eng mawina chuan Blake-a chu Pathian ropuizia a hmuhtir nasa em em a, a kianga pa pakhat lo kal chu a banah a lo vuan chawt a, tuifinriata ni zung inkhawh lut sung chu a kawhmuhtu sawk sawk a, "En teh, en teh, eng nge i hmuh le?" tiin phur em emin a zawt chuk chuk a.

Chu pa lah chuan, "Rangkachak pawisa nawi ni awm tak ka hmu ka ti. Nang, eng nge i hmuh chu le?" tiin a zawt let a.

Blake-a erawh chuan hlim em em hian, "Pathian ropuizia ka hmu a ni. Pathian hi a lo va ropui em!" tiin a chhang a.

KTP leh SOCIAL MEDIA

2 Timothea 4:5

— T.Upa Richard B. Lalhriatpuia
Committee Member, CKTP

mizoramah hian kum 25 vel kal ta (1990) aṭang khan computer a lo lut ṭan a, kum 2004 vel aṭangin mobile leh internet kan lo hmelhriat ṭan baw a. Chumiin a ken tel chu, social networking site hrang hrangin min rûn ṭan tihna a ni tel baw a ni.

Social media kan hman lar zual ṭhenkhatte -

1) **Facebook** : Tunlaia social networking site hmangtu ngah ber tih theih hial leh ṭhalai, tleirawl leh puitling chena awmtleitu site hausa a ni a. He site hi kum 2004 February thlaah khan Harvard University (USA)-a zirlai Mark Zuckerberg leh a ṭhiante – Eduardo Saverin, Andrew McCollum, Dustin Moskovitz leh Chris Hughes-te siam a ni a. Kum 2012 a an chhût danin tlawhtu leh hmangtu vaiṭelchhe khat chuang an nei tawh.

2) **Twitter** : Kum 2006 March thla khan Jack Dorsey, Evan Williams, Biz Stone leh Noah Glass kutchhuak niin site hmangtu ngah top 10 zingah chhiar tela ni der tawh. Hmangtu maktaduai 500 zet a nei a ni.

3) **WhatsApp** : Kum 2009-ah khan Brain Acton leh Jan Joumten California (USA)-ah an hmuchhuak a. Ni tin message vaiṭelchhe 1 chuang zuk dawng ṭhin a maw le!

4) **Telegram** : Telegram hi Russian unau Nikolai leh Pavel Durov-ten kum 2013-a an duan chhuah a ni a, thu leh milem inthawn bakah document file hrang hrang a inthawn theih avangin mi tam takin ṭha an ti hle.

5) **Wechat** : Ma Huateng-a bultumin kum 2010-ah hei hi bul ṭan niin kum 2011-ah chuan China aṭanga an site siam lar tak a ni der tawh a. Hmangtu mihring maktaduai 300 chuang an ni mêk a ni.

Heng hi hria ila -

1) Social media hi do chi a ni lo va, hman tângkai leh hman that inzirtir tûr a ni zawk a. Cliff Richard-a hlaa, "Why should the devil have all the good music?" tih ang deuhvin, hmanraw chhuak thar apiang dova, Setana thil veka chhuah tum aiin, Pathian ropuina atan leh rawngbawl na atana hman tângkai tum zawk hi keini KTP member-te chuan kan tih tûr a ni ngei ang.

2) Rel tlan laia lawn tum chu mahni insawh chhiat vek theihna a ni. Hmasawna leh changkanna hi keini Mizo hnam naupang tê hian kan hriat thiam, kan zir thiam hmaa min luhchilh avangin kan fimkhur a pawimawh hle. Chhungkua, khawtlang leh kohhran platform a tanga kan inzirtir a tûl takzet a ni.

3) Min tithatchhetu a ni tan ta mêk em aw? Hna leh mawh-phurhna tûlh phah hialin social media hian min tibuai tan ta a. Inkhawm, hla zir leh hnatlang chenin min tikhawtlaitu leh min tisawt lotu a ni tan ta mêk a nih hi. Kan kheuh va, kan bih ngur

ngur a, a tawpah kan nui leh huk a, râl a tanga min lo hmutu tan chuan, "Saw pa/nu chu a 99 deuh em maw ni le?" tih mai awl tak kan ni. Thian aiin kan ngaina zawk emaw tih tûr a ni a. Siamtu thil siam zinga ropui ber mihring inngaihthahna leh inngaihsak lohna hi sual a ni tih hi kan inzirtir thar leh a pawimawh hle.

4) Social Media-te hian hun a heh a, thil tha dang leh nun kawng dik zawh turin mi a ti tûanawp hle thei, lehkhabu kan chhiar tlem phah hle baw.

5) Isua aiin kan mobile phone-in kawmtu a hmu zing zawk em, tih pawh hi zawhna lian tak a ni ta.

6) Takna leh urhsunna, kohhran zepui leh ril tak hi social media hmangin kan tidal mêk a; committee, hla zir leh hnatlan-naahte min concentrate-tir thei lotuah a chang tan mêk.

Kan hlawkpui em?

1) Social media hi mahni kan inthunun theih leh theih loh infiahna tha tak a ni a, mahni kan inthunun theih loh chuan social

media-te hian min ei ral theiin, KṭṭP-a inhmang tak chung a Bible chhiar leh ṭawngṭai min inthlahdah tirtu a ni thei.

2) Kan hmang ṭangkai nge kan hun a tihek thlâwn? Social media hian kan hun a ei nasa khawp mai. Zan rei tak tak kan menpui a, henga kan thu chhiar leh post-te hian hmasawnna min pe nge kan hun a tihek thlâwn? Mahni i inzawt ṭheuh ang u.

3) Hriatna kan neih belhchhah em? Social media kal ṭlang hian hriatna chu kan neih belh nameuh mai; amaherawhchu, kan hun sen ral leh hriatna kan neih belhchhah hi a inphu em? Tin, hriatna kan neih belhchhah hi kan hlawkpui nge kan hoh phah zawk? Social media avanga kan hun leh sum sen ral leh kan hlawkpuina hi a inman reng em?

4) KṭṭP-te hi eng chenah nge kan tel ve dawn? Ṭhalai kan ni a, khawvel hmasawnna hi a man chak, thiam leh hmang nasa ber kan ni ṭhin. Social media-ah hian eng chen hi nge kan tih tur leh tih loh tûr tih hi

KṭṭP-te hian kan chian a ngai. Keini KṭṭP member-te hi chuan thu ho leh milem ṭha lo tak tak te, video rapthlak pui pui te thawn darha, a hre hmasa ni âwm taka lo bengvar ve chian tûr kan ni lo vang. Tin, KṭṭP huang chhung leh thil dangah pawh kan hriat duh leh kan hriat chian loh te zawh fiah theih reng, social media kaltlanga intihmualpho tum ni âwm taka zawh leh comment kher te hi kan tih loh a ṭha. Khawi lai emawa accident leh thil danglam deuh thleng, a hre hmasatu nih duh vanga thlalak nena lo theh darh chian te hi kan tih loh tawp tûr a ni. Heng thilahte hian KṭṭP member-te chu kan danglam tûr a ni dawn lo'm ni?

Ṭlangkawmna

2 Timothy 4:5-ah, “Nang erawh chu engkimah fîmkhur la, hrehawm tuar la, Chanchin Ṭha hriltu lam hna thawk la, i rawngbâwl na kha hlen rawh,” tih kan hmu. Keini KṭṭP member-te hi social media kan hman kawngah te hian, “Nang erawh chu fîmkhur la,” min ti a ni tih i hre reng ang u ♦

Isuan thlemna hi engtin nge a thlir?

— Zonunsanga
Post: Ramhlun

Luka 4:6-8 : Tin, Diabola chuan a hnenah, "Heng zawng zawng chung a thuneihna leh a ropuina hi ka pe ang che...Chutichuan, chibai mi buk la, a zain i ta a ni vek ang," a ti a. Tin, Isuan a hnenah, " 'Lalpa i Pathian chibai buk la, ama rawng chauh baw' rawh,' tih ziaak a ni," a ti a, a chhang a.

Isuan ni 40 chaw a nghei thu hi mi thiamte chuan Mosia Horeb tlanga ni 40 a thang te, Elija ni 40 thlalerah chaw ngheia a awm hnua Pathian âw a hriat te, Israel mite kum 40 thlalerah an vahvaih te nen pawh a kal rem hle a ni an ti a. Khang kha a entir a ni ang an ti a. Juda-te hriat thiam zawng takin ni 40 hi a langsar hle.

Isua thlêm a nihna hmun hi zir mite chuan Jordan lui ațanga hla vak lo Jerusalem leh Dead Sea inkara Quarantania hmun vel hi a ni e an ti a. A dikna tak tak kan hre thei tawh lo. Heng lai

hmunah hian lung, chhang ang tak tak a tam mai an ti a. Isua thlêmna tawh hi a hring a hrana thlêmna nge chhungril thinlung lama inbeihna (inner battle) tih hi hriat a har hle.

Thlarauva a khah lai takin thlêm a ni : Mak tak maiin Isua thlêmna a awm hun hi Thlarau Thianghlima a khah lai tak a ni! Thlêmna awm leh thlêm theiha awm hi sual tihna a ni kher lo tih a lang Chiang. "Pathian fapa i nih chuan," a tih hian Diabola hian inrinhleltir a tum a, Pathian thu aia mahni inrin tawkna nei tura thlêmna pawh a ni nghal. Ni 40 zet chaw nghei ta chu a ril a tam hle ang tih a rin theih a. Chung chu remchangah lain thlêmtu hi a rawn che chat mai. Isuan duh ni se lung chhanga chantir te chu a duh athu a ni ang chu. Pathian thu hmangin a lo hneh chat a nih kha.

Thlarau pâwlina kan chan lai hian kan chhehvelah hian lung chhanga chantir tur, intihtlaina tur a va tam si em! Kan riltam chak loh lai takin thil sual tih pawisak lohna,

awlsam taka chhanga chantir tura mahni inthiamna bawihah, “Mi pawhin an ti alawm,” tih hmangin min thlêm fo. Isua erawh chuan ‘chung ti lo chuan a nun theih’ tih hi a chhanna a ni.

Thuneihna (power) hmang sual tura thlêm a ni : Luka 4:6-a thuneihna Diabola'n pek a tiam hi a ril hle. A ãawng bul lam han en ila 'exousian' (?) tih a ni a, chu chu thuneihna tih piah lamah engkim chung a thuneihna a kaw a (authority/jurisdiction/liberty/power/right/strength tiha lehlin theih a ni hlawm). He ãawngkam hi thuthlung tharah hian vawi 102 lai hman a ni. Diabola hian dawt Chiang takin thuneihna hi ama ta angin a sawi a. He thuneihna hi ama ta ni lovin Pathian ta, Pathian ațanga chhuak zawk a ni.

Isua khan tihluihnaa lal atana siam an tum khan a tlansan a nih kha (Joh 6:15). Diabola thlêmna hi thiltih-theihna leh theihna hmang sual tura thlêmna a ni a; nimahsela, Isuan a thiltih-theihna hi chutiang atan a

hmang ve ngai lo. Mi dang ãanpui nan leh Pathian ropui nan a hmang zawk ãhin. Keini hian kan theihna leh chakna hi kan hmang sual fo em? Isuan mi dang nekchep nan leh intihvei nan vawi khat mah a hmang ngai lo va, a hmang ngai baw lo vang.

Lârna (popularity) hmanga thlêm a ni : Nazaret thingrem siamtu (carpenter) tan chuan Diabola thlêmna, a pek tum nia a insawi (offer) hi a tam a nia. Larna leh lansarhna (celebrity), hmingthanna (fame), ngaihsan theih tur (hero/idol/icon), thil mak ti theitu (magical power neitu) hmuha an hmuh theihna tur hmangin a bei chat mai. He thlêmna hi Messia a ni tih lantir theihna tur khawp a ni baw. Juda-te hian chhin-chhiahna an phut ãhin a, chumi rilrem zawng tak chuan thlêmtu hi a che chat mai.

Isua kha biak in chhip zum ațang khan han zuang thla ngat sela a va lar dawn em! An zui hut hut ang a, media zawng zawngah an tidarh nghal ang chu! Ropuina, thiltihtheihna, lansarhna hmangin Isua a thlêm. Heng

hi mihringte chak lohna ber a ni fo. Nimahsela, Isuan a hnar fithla ðhak a nih kha. Intihlar, intihropui lam a nunah a leng ve lo. Keini hian heng thil hi kan duh luat avang hian chibai buk tur kan zawng ruai ðhin em?

Zirtirna him lo (heresy) hmanga thlêm a ni : Diabola hian zirtirna him lo hmangin Isua a bei. Bible-a mi hmangin Pathian Fapa meuh pawh zuk thlêm a (Sam 91:11-12)! A huai salh salh ngei mai. Thur chhuah tur lah a hria. Awm ang tak si, ni ziktluak si lovin a bei a; nimahsela, Isuan Bible ziaak hmang bawkin, 'tih ziaak a ni,' tiin a hnial thla thei vek tho a nih kha (Deut 8:3; 6:16; 6:13; 10:20).

Tunlai hian zirtirna mak tak tak, Bible-a mi, duh lai lai la chhuakin awihawm taka sawi leh zirtir an awm ðhin. Hlah tur dik hlau lova hlah loh tur hlau zawk ta tlat pawh kan pung zel! Keini hian heng hi engtin nge kan dawnawn ve ðhin le? Setana kha a lan dan chuan a râu a nia. Pathian thute kha a hre em em. Nimahsela, Pathian thu a ni lo zawnga kalpuina a ni si. Kohhran zirtirna bak pawn

lam tuipui loh a him ber fo a ni tih Isuan thlêmna a hmachhawn chungchangah hian kan hmu.

Thlêm/Fiah kan nih hi Lalpan a phal : Thlêmna hi 'fiahna' a ni ve bawk. Chanchin ðha ziaka thlêmna tih ðawngkam hi 'peiráz(?)' tiha dah a ni a, chu chu 'fiahna' tih ðawngkam atana hman ðhin tho a ni a. Thil thuhmun tho niin a lang. Kan rinna fiah nan te, mawh-phurhna kan chungah nghah ngam a ni em tih fiah nan enchhin/thlêm kan ni ðhin. Kan dawnawn dan azirin malsawmna a ni thei a, chhiatna a ni thei bawk. "Thlêmna tuar hram hramtu chu a eng a thawl e; fiahna a awm hnuin nunna lallukhum, Lalpan amah hmangaih tute hnena a tiam chu a hmu dawn si a" (Jak 1:16).

Pathian khawngaihna leh ðhatna, a zahngaihna kan hmuh theih nan thlêmna/fiahna hi mihring min tifamkimtu a ni. Isua meuh pawh thlêma a awm chuan keini hian thlêmna chu kan tawk ve ang tih ring ila. Kan mit châkna tawktarh a va dah sang ðhin êm! Kan suang-tuahna leh hlawhtlin kan duhna (vision/

dream) hmang ngeia min thlêm hun te pawh a la awm ang. Joba nun ațangin thlêm kan nih Lalpan a phal tih a lang; Isuaah a Chiang leh zual.

Thlêmna hi hneh theih a ni : Thlêmna hi kan rinna fiahna a nih ve țin bawk avang hian hneh theih, pal tlang theih a ni. Isuan hneh dan tur ama tawn (experience) ngei ațangin min kawh hmuh tawh a. Kan tuar theih bak thlêmna reng reng kan chungah a thleng dawn lo tih Bible-in min hrilh a. Thlêmna a awm rualin tlan chhuahna kawng a siam nghal zawk țin tih Chiang takin kan hmu bawk (1 Kor 10:13).

Tisa leh thlarauva kan chak loh, kan hniam lai (depress) takin rinhlelhna hmang ten min bei țin. Kan chakna ber leh chak tawk nia kan inhriat lai takin thlêmtu a hnai fo. Thlêmna a lo kalin Isua anga 'ti h zia k a ni' tih hmanga kan hneh theih nan Bible kan kawm ngeih a țin ang. Kal sualna laka min vengtu Pastor leh Upate kan râwn taimak pawh a țin. Mahni thua Pathian thu kan tuipui hian thlêmtu a rawn inrawlh vat țin.

Isuan thlêmna a chhuk thlir:

Isuan he khawvela a len lai khan vawi tam tak thlêmna a lo hneh tawh țin a. Keini pawh min ținpui a peih. A thlirna tarmit ațang chuan min hre thiam em em (Heb 4:15). Ani khan thlêma a awm lai khan a chhuk thlir a, inhnehtir a tum lo. Isuan thlêmna ata hnehna a chan zawh chiaha thil thleng ropui deuh chu – angelte an rawn lang nghal hi a ni (Mt 4:11). Diabola kha a beidawng reng reng lo. Hun remchanga thlêmah a kalsan rih mai chauh a nia (Lk 4:13). A zirtirte hmangin thlêmtu hian a bei zui a (Mt 16:22). Geth-semene huanah pumpelh châkna nasa takin a bei a. Kraws lera a awm hnuah pawh tihelna hmangin a umzui zel. A bula mi sual an khen beh hmangin thlêmtu a che bawk. Nimahsela, thlêmtu hian vawi khat mah Isua hi a hneh lo va, chatuan atan a hneh lo hlen ta a ni. Keini pawh thlêm kan nih hunah Isua hneh sa a ni tih hriaa chhuk thlira, Isua lam enin inring rengin i awm fo vang u♦

Laipuitlang Branch KTP Khagaria Work Camp

— Lalsangzuala
Secretary



Laipuitlang Branch KTP chuan Pathian kaih-hruaina hnuaiah tluang takin November ni 3-13, 2014 khan 'feh chhuah' rawngbawl na kan nei a; Patna Mission Field chhunga Khagaria Pastor Bial chu tlawhin, chu hmunah chuan *work camp* tluang takin kan zu nei a. Work camp-ah hian mi 19 kalin, Upa Lalbiakmawia Khiangtein min ho va. Kan hun hman dan tlangpui leh work camp kan neihna hmun chanchin tlem azawng kan han tar lang dawn a ni.

Kalkawng

November 3, 2014 (Thawhtanni) chhun dar 12:00-ah MST Bus-in Station aṭanga chhuakin, November 4, 2014 (Thawhlehi) zing dar 8:40-ah tluang takin Synod House, Guwahati kan thleng a. Guwahati-ah hian

Khagaria-a missionary a thawk Tv. Vikash-a leh Nl. Pari-ten min lo hmuak a. Guwahati-ah hian zan khat riakin a tuk November 5, 2014 (Nilaini) chhun dar 12:10-ah train-in kan chhuak leh a, a tuk November 6, 2014 (Ningani) zing dar 7:55-ah Bhagalpur kan thleng. Bhagalpur Station-ah hian Pu Robert Lalchungnunga, IAS (Divisional Commissioner) mi leh saten bus nen min lo hmuak a, Commissioner Bungalow lam min panpui a, anni bakah hian Khagaria lam aṭangin min hmuaktute an lo thleng ve bawk. Pu Robert-a hian a bungalow-ah hian thingpui leh tukṭhuan tui tak min buatsaihsak a, kan Mizopui ngei Commissioner a lo awm chu kan thlamuanpui hle a ni.

Hemi ni hian BJP-in bandh an huaihawt avangin tukṭhuan ei kham hian Police escort-na hnuaiah Khagaria lam panin bus-in kan chhuak leh a, bus hmaah hian jeep-in hma an hruai zel a. Pu Robert-a mi leh sate hian min escort lo se chuan kan tum hunah Khagaria hi kan thleng kher awm lo ve. Tluang takin Khagaria hmun chu chawhnu dar 2:20-ah kan thleng ta a ni.

A hmuna hun hman dan

Khagaria kan thlen hian Pastor Quarters-ah innghatin, a hmuna mite nen inhmelhriatna hun te kan hman a, thawktute min lo dawnsawn danah kan lawm hle a ni. Zanzaria ei kham hnuah tih tur tul ang ang kan tih zawhah Biak Inah Pastor Zoramawia kaihhruainain lawm thu sawi tawngtai rualna kan nei leh a ni.

November 7, 2014 (Zirtawpni)

Hemi ni atang hian hna kan thawk tan ngal a. Zing dar 9:30-ah thawk tanin, thenkhatin biak in choka plaster an buaipui laiin mi dangin biak in rawng an hnawih thung a. Hemi ni hian mistiri pahnih leh helper pakhat kan ruaiin kan theih tawkleh kan phak tawkin hna kan thawk tlang a ni. Hna kan thawh zawh hnua zanzaria tui tak kan kil ho hnuin kan inkhawm a, Pu Hmingthanpuia'n thuchah a sawi a, kan hlim hle a ni.

November 8, 2014 (Inrinni)

Ni khat chiah hnathawhna hun kan neih tawh avangin zawh hman ngei kan duh si a, hemi ni atan hian mistiripathum leh helper pakhat kan chhawr a. Zing dar 6:30

atangin hna kan thawk tan a, theihtawp chhuahin kan thawka, zan dar 7:00 velah biak in choka plaster, chhuat chhun, kawng chhun leh biak in rawng hnawih chu kan zo thei a. Zanzaria ei khamah biak inah kan inkhawm leh a, Pu K. Lalengzama'n thuchah a sawi. Hna kan thawhnaah hian Pathian hruaina kan chang takzet a, tu mah intipalh leh harsatna tawkan awm lo va, hlim taka hna kan thawh theih avangin kan lawm hle a ni.

November 9, 2014 (Pathianni)

Zing dar 9:30-ah Pathian biak inkhawm kan nei a. He hunah hian naupang zaipawl, Mahila Zaipawl, Laipuitlang Kohhran Zaipawl bakah Pu Loncy Lianchungnunga-te an zai a. Khagaria Kohhran report ngaihlak a ni a, Upa Lalbiakmawia Khiangtein thuchah sawiin kohhran report a pe ngal bawk. Inkhawm ban hian naupang intihhlimna hun hmanpui a ni a, infiamna hrang hrang siamin lawmman te siam a ni a, kan hlimpui hle. Chawhnu dar 2:00-ah ruai tuihnai tak kan theh a. Chawhlui kan han kil ho hian inpawhna min siamsak leh zualin kan innel phah hle a ni.

Chaw ei khama thil t̃ul ang angte kan tihfel hnuah Labhgaun lam panin Film Show nei turin motor pathumin kan kal a. Labhgaun hi Khagaria hnaih te a awm ni mahse an dinhmun leh khawsak phung chu inthlau tak a ni a, an hnufual em em a ni. Labhgaun kan thlen hian Evengelist Tuntuna'n thu a sawi a, he mi hnu hian Film Show neih chhonzawm nghal a ni a, Bible tract te sem a ni bawk. Thawktute sawi danin Film Show an neih tawhah mi an pun hnem ber/entu an tam ber t̃um niin an sawi a, hmuhdawm an ti t̃lengin Pathianin hna nasa takin a thawk niin kan hria a kan lawm hle a ni. Film show kan neih zawh hian zanriah min buatsaihsak chu tui ti takin kan ei ho a, kan ei kham hian Khagaria lam panin kan let leh a, zan dar 9:20 velah kan thleng leh a ni.

Haw Kawng :

Nov. 10, 2014 (Thawht̃anni) chawhnu dar 1:00-a inthlahna inkhawm kan hman zawh hnuin chawhnu dar 1:40-ah Khagaria a mite nen chuan inngai taka inmangt̃ha chungin Bhagalpur lam panin kan chhuak a, t̃uang taka kalin t̃lai dar 4:20-ah Commissioner Bungalow kan

thleng a. Commissioner hian zanriah tui tak min lo buatsaihsak leh a. Kan chuanna tur train delay a nih avangin zanriah kan ei khamah Pu Robert-a hovin Krismas hla te kan sa ho a, kan hlim t̃lang hle. Bhagalpur Station-ah hian Pu Robert-a naute hian train kan luh thlengin min thlah liam a ni. November 11, 2014 (Thawhle) zing dar 00:45-ah Bhagalpur at̃ang hian kan chhuak a, a zan dar 8:15-ah kan thlenna hmun tur Cachar Hill Tribes Synod Guest House, Guwahati kan thleng a. November 12, 2014 (Nilaini) t̃lai dar 5:20-ah Guwahati at̃angin Network Bus-in kan chhuak a, November 13, 2014 (Ningani) chawhnu dar 2:30-ah t̃uang takin Aizawl kan thleng leh ta a ni.

Khagaria Fellowship Dinmun

Khagaria Fellowship hi Patna Mission Field chhunga Pastor Bial pakhat a ni a. Patna Mission Field hi kum 1999-a din a ni a, a din t̃an tirh at̃angin sum leh tha senna tam ber (80% vel) chu Dumka District-ah a ni. Santali-ho an inhawn em avangin an zingah theihtawp chhuahin rawngbawl t̃hin a ni a, hma pawh an sawn chak viau. Thahnemngai taka kum 10 vel

rawng an bawl hnuah kum 2008 April thla khan Patna Field aţangin Jharkhand Mission Field a lo indang ve ta a, Jharkhand Field indan aţang chauh hian tuna Bihar state lamah hian evangelism lamah pawh uar zawkin hma an la a; Field thar, bul ţan thar ang an ni. Fellowship 10 vel Pastor pakhatin a enkawl ţhin. Kum nga vel a lo vei leh chuan tunah hian Fellowship 30 lai a lo awm ve ta a, Pastor Bial pathum – Patna North, Patna South leh Khagaria Bialte a awm a ni. Khagaria Bial chhungah hian Fellowship a awm nual tawh a, Fellowship thar hawn tura hmachhawp an nei nual bawk.

Khagaria Biak In hi he lai biala biak in awm chhun a nih avangin ringtute bakah ringlote pawh an kal ţhin a. Anni hian natna nei ţawngţaipui tur te, chhungkaw harsatna avanga harsatna nei te, fa neih theih loh avanga harsatna tawk leh chhan chi hrang hrang avangin biak in hi pan khawmin, a theih ang angin thawktu awm chhunten Pathian hnenah an mamawhte an dilaui ţhin a. Pathian hnathawh a lan zel theih

nan ţawngţaipui ila. Thawktuten hriselna ţha tak nen rawngbawlna an kalpui zel theih nan te, ringtharten mi mal, chhungkua leh khawtlanga harsatna an tawh hrang hrang bakah Khagaria Fellowship-ah hian thawktu Mizo chhungkua 3, Local Field Worker 2 leh Kraws Sipai 1 an awm meka, heng thawktute tan hian ţahnemngai takin i ţawngţai ţhin ang u.

Tlangkawmna

Ramthara work camp kan neihnaah hian Pathian hruaina kan dawng nasa em em a. Kalkawng leh a hmuna kan hnathawhna hrang hrangah harsatna em em kan tawk lo va. Harsatna kan tawh theihna tur tam takah Pathianin mi ţangkai tak tak min pe zel a, a lawmawm hle a ni. He hun hlu tak mai hlawhtling taka hmang thei tura min hruaitu Pathian chungah lawm thu kan sawi a; kohhran min ţawngţai-puinaah te, ţanpuina min petute leh kan zin chhunga min buaipuitu zawng zawng chungah lawm thu kan sawi takzet a ni. ♦

Youth Recreation Centre (YRC)

Rum 1987 khan KṮP chuan Hlimen ramah hmun zau ṭha tak leiin, hei hi ṭawngṭaina hmun leh Youth Recreation Centre atan tiin hma a lo la tawh a. Kawng hrang hranga hma lak a niin KṮP member-ten ₹ 5 zelin kum eng emaw chen chu sum pawh kan lo thawh khawm tawh a. Theih ang anga hmalak zel a ni chungin a hmunhma chungchangah chhunzawm zel a remchan loh avangin Hlimen rama YRC hmun chu hluihlawn a lo ni ta a ni.

YRC hmun atan hian kan hruaitu hmasaten theihtawp chhuahin hun eng emaw chen hmun an zawnga, ram leh hmun hrang hrang an lo en tawh leh an bawhzui tawhte chu - Lungleng ram, Muallungthu/ Melriat ram, Sairang leh Buichali lei inkar, Sairang ram, Lengpui Airport bul, Lungpui ram (Mamit Road), Lengte ram, Sihhmui ram leh Falkland Presbyterian Biak

In bulte a ni a. Tin, Bawngkawna Synod ramahte pawh YRC hmun nei mai thei dawna kan inngaih laiin Synod-in Falkland-a Pu Sangsiam a ram cheng nuai zathum chuanga a lei chu, “CKṮP YRC atan hman ni se” (SEC 251:46) tia a rel thu CKṮP chuan a dawng a, a lawmawm takzet a ni.

Tichuan, CKṮP Meeting vawi 667-na chuan YRC puitlin thuai a nih theihnana hma la tur committee a din ta nghal a. YRC bawhzuitu committee pawhin a theih ang tawka hma lain, YRC hmun tura a ram neituten an lo luah hawhtir Spastic Society hnuaia Gilead School hotute nen pawh inhmuh khawm a ni a. Society lamte nen inberawn chung zelin a hmun sam fai leh Gilead School insawnpuin hnatlang pawh neih a ni tawh nghe nghe a ni. Architect-in Digital Mapping tih na’n a mamawh avangin khawpui chhung bialte, 2014 November ni 14-ah bial 5, ni 23-ah bial 8 leh ni 25-ah bial 10-ten sam fai hnatlang neih a ni a. Tin, 2015 March ni 7-ah bial 7 leh ni 14-ah bial 9 aṭangin khawpui chhung branch-ten Gilead School ṭhiah leh an bungruate thiarin hnatlang neih leh a ni baw. Hnatlanga kan tha sen zawng

zawng hi 2,019 lai a ni a. Member-te inpekna azarah hma nasa taka lak a ni hi a lawmawm takzet a ni.

YRC hmun hi bigha 13 laia zau a ni a. Hun rei tak kan lo buaipui tawh leh ruahmanna hmasate bawhzui zelin, YRC hmun atan hian architect pawh rawih fel a ni tawh a. YRC-ah hian hengte hi awm thei tura ruahman a ni:

A. AUDITORIUM

1. *Auditorium Block-I*

Auditorium Block-I-ah hian mi 1,000 (sangkhath) len theihna tur leh Green Room tha tawh tak.

2. *Auditorium Block-II*

Auditorium Block-II-ah hian mi 500 (zanga) len theihna tur leh mipui tana hman theih tur inthiarna.

3. *Basement Parking*

Basement Parking-ah hian motor park-na tha tawh tak, car 80, two wheeler 124 leh bus 5 dah theihna.

B. CONVENTION CENTRE

1. *Conference Room*

Conference Room-ah hian mi 1,000 (sangkhath) len theihna tur room tha tawh tak.

2. *Lounge, Reception*

Mipuiten tangkai taka an

hman turin lounge leh reception changtlung tak.

C. GUEST ACCOMMODATION BLOCK

1. Guest Room changtlung tak.
2. Mipa 20 (sawmhni) riah theihna tur dormitory tha tak.
3. Hmeichhia 20 (sawmhni) riah theihna tur dormitory tha tak.
4. Choka changtlung tak leh mi 500 (zanga) len theihna tur dining hall tha tak.

D. OTHER AMENITIES

(Thildangawm tura ruahman)

1. Football ground pangngai leh tha tak (50mx36.5m).
2. Basketball court.
3. Thalaite leh kohhran miten tangkai taka an hman tur Bethel-na hmun.
4. Swiming pool nuam tak.
5. Pawna ei leh in nuam taka buatsaih theihna hmun.

Heng ruahmante hi Pathian hruainaa kan tihhlawhtlin hunah chuan, KṚP tan hmun pawimawh a ni ang bawkin kohhran tan leh ram tan pawha ro tling tak a ni ngei ang tih CKṚP chuan a beisei a ni.

YRC a hlawhtlin theihna tur hian hun rei tak member-ten pawisa kan lo thawhkhawm

tawh a. General Conference leh Rorel Inkhawmah pawh vawi tam tak agenda-a lo neih tawh a nih avang hian a hlawhtlin hun hi kan nghakhlel tlang hle tih a hriat a ni. Kumin 2015 Rorel Inkhawma YRC puala sum thawh chungchang bik agenda panga lut aṭangin Rorel Palaite chuan hetiang hian sum thawh khawm dan tur a rel a: *“YRC pual hian budget, Aizawl khawpui chung tan member pakhat ₹ 50, District Capital tan ₹ 30 leh a dang zawng ₹ 20 thawh.”*

Kum dang aia member pakhat thawh tur hi a tam tak avangin kan ṭan tlan lehzual pawh a ngai hle dawn a ni. Kan budget hi Branch tinten kan tihhlawhtlin theihna atan ngaihtuahna kan hman nasat lehzual a pawimawh ang. Budget a nih angin, member tina khawn pawh a remchang ang a, member-tea a zavaia khawn kher lo zawnga YRC budget tuak dan kan ngaihtuah chhuah thiam phei chuan a ṭha viau ang. Member pakhat chhûta ₹ 50/30/20 thawh hi tam viau angin lang mah se, kan YRC project ngaihtuah erawh chuan hei aia tam pawh thawk chhuak thei kan ni ngei ang.

Kristian Ṭhalai Pawl member-ten ram pum huapa kan thil neih inṭawm tur (YRC) hi Mizoram Synod tan pawha asset tling pha tur a nih ngaihtuahin, phur takin a tihhlawhtlin dan i ngaihtuah zel ang u.

Kan sum thawh khawm tur hi November, 2015 thla ral hmaa CKṬP Office-a theh luh tur a ni a Heng bakah hian KṬP inkhawm thawhlawm ṭum khat YRC pualin lakkhawm ni se tih rawtna bial pahni aṭanga lut pawh Rorel Palaiten tihhlawhtlin ngei ṭha an ti baw k; hei erawh hi chu July, 2015 thla ral hmain theh luh tur a ni thung dawn a ni.

YRC hi KṬP member-ten kan ngaihvenin kan tuipui hle mai a, hlawhtling thuai se tih hi kan duhthusam a ni ngei ang. Kan rawngbawl na peng dang thlahthlam si lovin theihtawp chhuah zel turin kan inngen a, a ṭul dan azirin YRC chungchang hi tar lan zel tum a ni a. Member-te kan inpekna azarah tunah hian Falkland-a kan ram pawh hmalak mai theih tura ruahman a ni tawh a. Kan sum thawh khawm sa aṭang hian a hmun laih zawl hna pawh a theih chen chen ṭan thuai turin hma lak mêk a ni. ♦

SUNNA



Pu B. Lalnuntluanga hi Feb ni 25, 1974-ah Pu S.L. Khuma (L) leh Pu Zahmingliani-te fa 3-na ni turin Lushaichhera (Thinghlun) khuaah a lo piang a, an unau hi 7 an ni. Ni 24.4.1998 khan Lalpan a kawppui turin Lalhming-mawii d/o Pakunga, Chanmari, Aizawl a pe a, fanu 2 an nei.

Rawngbawlina lam

Tluangpuia hi kohhran leh khawtlangah rawngbawlin mi ñangkai tak a ni a, a phak ang tawk tawka tel ñhin a ni.

Kum 1995 leh 1996 hian Kanhmun Kohhran chawmin Evangelist hna Kanhmun North-ah a thawk a, heng kumahte hian Branch O.B. a ni nghe nghe. Nupui a neih hnuah pawh kum 2002 a ñanga 2004 khan Kanhmun Bial Kohhran Hmeichhe chawmin Lily Veng B/c-ah a thawk leh bawk a ni.

Kanhmun Lily Veng B/c a ñanga a rawn chhuah chhoh leh hnu hian Kanhmun Branch leh

Bial KTP-ahte O.B. a ni ñhin a, kum 2014-ah pheih chuan Kanhmun Branch leh Kanhmun Bial KTP-ah Leader a ni kawp nghe nghe a ni.

Rawngbawlina hrang hranga a chanvo lo chelh tawh dan chu hetiang hi a ni:

Finance Secretary, Kanhmun Br. 1993,1994.

Secretary, Kanhmun N Br. 1995

Leader, Kanhmun N Br. 1996

Evangelist, Lily Vengah 2002-2004

Asst. Secy., Kanhmun Br./Bial Committee 2007

Kanhmun Br. Secy./ Bial Secy. 2008-2010

Br. Leader/Bial Asst. Secy. 2011

Br. Leader/Bial Secy. 2012

Br. Asst. Leader/Bial Asst. Leader 2013

Br. Leader/Bial Leader 2014

Kanhmun Kohhranah hian Pathianni chawhnu leh Inrinni zan thuhritu, Puitling SS zirtirtu, Light & Sound Sub-Comt., Ramthar Sub-Comt., Krismas leh Kum Thar Sub-Comt., Building Sub-Comt.-ahte chanvo a nei mek a, Kanhmun Branch Diamond Jubilee Organizing chairman a ni mek bawk. Bial Zaipawl Director a lo ni tawh bawk.

A hun tawp lam

Pu Tluangpuia hian kum 2015 hi KTP a over-san hun tur chiah a ni a, Branch leh Bial KTP member-ten kan ui hle a, KTP over thlenga min telpuia, min hruai hi kan chhuang takzet a ni.

Jan ni 23-25, 2015 Bial KTP Conference, Kanhmun Kohhranah hlim takin min hmanpui a. Rorel te tha takin min kaihruai a. Ni 25.1.'15 zan inkhawmah Leader a nih angin sermon pawh tha tak leh ropui takin a sawi a. Thupui, "A ta ka ni a, a rawng ka bawl thin" (Tirhkohte 27:23 leh 2 Timothea 4:10) tih thu a sawi zawhin 'Isua hmangaihna leh thatna' KHB no. 495 a thlang zui a. Inkhawm ban Fellowship-ah intihsiak lawmman te a sem leh vek a ni. Chutia, KTP puala hun kan hman zawh hnu chuan chungkuain tha taka an mu chu khawvar lam zing dar 4:00 vel atangin a pum a nat thu a

sawi a, a biak theih loh zui a, eng mah inbuaipui hman lovin zing 4:45-ah min boralsan ta mai a ni.

Hetianga kan Bial Leader kal chhuakin nat lawk pawh awm lova min boralsan thut hi mak kan ti a, kan ui a, Bial KTP member zawng zawngten kan sun takzet a, inhriattirna pawh awm lovin KTP member, Conference- a kal zawng zawngte'n Pu Tluangpuia puala hun hnuhnung a vuina hun hman nghal vek a ni a. Rev. R. Lalnunenga, (Bialtu Pastor, Bial Chairman ni bawkin) vuina hun a hmang a, Bial Zaipawlin 'Ram eng mawi' tih hlain kan thlah liam ta a ni.

A nunah hian zir tur tak tak kan hmu a. A thahnemngaihna te, a rinawmna te, a taihmakna te a rawngbawlpuite min hnutchhiah hi ropui kan ti takzet a ni. ♦

—Zothansanga

Kanhmun Bial Secretary



COUNSELLING MAMAWHTE TAN

Mi mal, nupa, fanau, chhungkua, nulat tlangval, ringtu nun, etc.-ah harsatna i neih chuan Family Guidance & Counselling Centre pan thin la, an lo tanpui ang che. Telephone leh internet hmang pawhin biakrawn theih an ni.

Mission Veng, Aizawl - (0389) 2324443; Chanmari, Aizawl - (0389) 2306693
 Vaivakawn, Aizawl - (0389) 2344324; Champhai - (03831) 234055
 Serchhip - (03838) 226128; Kolasib - (03837) 220180
 email : synodfgcc@gmail.com



HRINGLANG TLÁNG

Pathianin min tidanglam

Pathianin ka nun a thlakthleng dan ka han sawi ve dawn a ni.

Lebanon rama Muslim chhungkua aṅanga piang leh seilian ka ni a. Kan rama Kristian leh Muslim-te an theihpatawp chhuaha a tam thei ang ber inthah tuma an inbeih lai khan kei pawoh ka unaupa nen lehkhazir chungin Muslim sipaiah kan inpe ve a; chemsen leh laifei nen, kan nunna thâpin kan hmêlma Kristiante chu kan bei ve nasa ngang mai.

Nunna thâpa inbei tih takah ka unaupa chuan Kristiante kut tuarin a nunna a chan ta nghe nghe a; a thih lai hian captain a ni. Keimah ngei pawoh chuan Kristiante lakah hliam ka tuar nasa hle.

Ka unaupa min thahsaktu Kristianho chu a tam thei ang ber thah ka duh avangin, rocket hman dan leh chumi hmanga hmelma beih dan leh vawmpuah vawm dante ka zir nasa a, silai chelek leh hman dan pawoh ka zir nep chuang lo. 'Ngil taka silai kah i duh chuan i hmaah Kristian a dingah ngai rawh,' tih hi kan hotuten min zirtir dan a ni tih Daily Herald chanchinbua thawk pakhatin min interview tumin ka hrilh nghe nghe a. Muslim sipaia ka ṭan lai hian a ruk a rala hmêlma kaptu (sniper) zingah ka tel pha nghe nghe a ni.

Kan ram khawpui, Beirut-a American University-a ka zir laiin ka unaupa chu hmêlma kutah a thi tih ka hre ta a. Ka thinlungah chuan Kristianho a tam thei ang ber thah duhna thuk lehzuah ka neih phah a. Chumi rilru pu chung chuan pistol thar ka lei nghe nghe a.

Mihringin rem a ruat a, lei chhanna erawh chu Pathian thu a ni thung. University-ah chuan Isua Krista zirtirna hi kan zir tel a, chung zingah chuan Isua zirtirna laipui an tih mai, Tlang chung a Isua thusawikha a tel nghe nghe a. 'In hmêlmate chu hmangaih ula, a tiduhdahtu

che u chu tawngtaisak rawh u,' tiin tlang chungah khan Lal Isuan a zirtir a nih kha (Mat. 5:44). Lal Isua zirtirna chuan ka kut, hmêlma thah châka za zek zek chu che thei lovin a phuar ta tlat mai a ni. Pathian thu thiltihtheihzia hi mak ka ti ngawt mai. Rinhlelh rual lohvin ka chungah a takin a thleng ngei si.

Pistol thar ka lei hnu rei lo têah zan khat chu ka hmêlma phil tumin zan thim hnuaiah ka chhuak a, awlsam takin ka hmêlmaho chu ka hmu mai reng a. Awmhmun ka siam rem a, dim takin ka pistol chu ka phawrh zal zal a, nghet taka humin ka pistol thar chu ka hmêlma lam hawi chuan ka tin ta a. Ka kutzungchalin a cheng chu ka kuai a, ðhelh ka tum lo. Ka hmêlmapa lah chuan thah tumin ka veh tih a hre reng reng si lo.

Ka hmet per ðep tihin, 'I hmêlma hmangaih rawh,' tih kha Chiang em emin ka thinlungah a rawn lut ta a, ka thinlunga chu thu rawn sawitu chu mihring a ni lo tih ka hria. 'Ka hmêlma chu tu nge ni? Ka unaupa thattute ngei kha an ni lawm ni?' tih chu ka thinlunga zawhna lo lut chu a ni.

Ka pistol hmehna chu hmet per turin keimahah chakna thahrui reng a awm tawh lo. Ka kut chu lek thla a, ka kutzungchal pawh chu ka phawh ta ngawt a. Chumi hmun, ka hmêlmate nia ka hriat that tura awmhmun ka remna ngeiah chuan Lal Isuan min pâwl a, ka thinlungah a hmangaihna thu a sawi zui a, thawklehkhatah tihdanglam ka lo ni ta a ni.

Ka pianthar dan leh Lal Isua neitu ka nih tak dan hi a rei lovin, awih har tak a ni ang tih ka ring; mahse, Lal Isuan thu a sawi tawh chuan tu thinlungin nge do zo vang! A thu hi khandaih hriam tawn eng ang ai pawha hriam, nunna leh thlarau, ruhtuah leh thlîng phel hrang thei khawpa chhun thei a ni si a; tu thinlung nge a tum dodal thei khawpa chak tawok awm ang le!

Lal Isua ka neih hnu chuan Kristianah ka inpe nghal a. Lombard khuaa Salem Kohhranah lawiîn, chu khuaah vek chuan missionary hna ka thawk nghal a ni. Salem Kohhranah kher ka lawi chhan pawh Lal Isua, Remna Lal hna thawk tur chuan chu kohhrana ka lawi chu ðulin ka hria a ni. Salem tih chu remna tihna a ni si a.♦ – Charles Swindoll

KOHRAN ZAIPAWL

— K. Malsawmkima
Bungkawn Branch

Kum hmasa lama Kristian Thalai chhuakah khan 'Zaipawl ṭha' tih leh 'Zaipawl Rawngbawl'na' tih thupui ngaihnaawm tak tihchhuah a ni tawh a. A bak sawi belh tur vang viau tawh mah se kohhran zaipawl hmasawmna a nih beiseiin ka ngaih pawimawh ṭhenkhat han tar lang ve ila.

Hla thlan uluk

Zaipawl ṭha tak nei tur chuan member-te inpekna piah lamah hla neih ṭhat/hla thlan uluk a pawimawh hle. Zaipawl member ṭha tak awmna, hla thlan fuh loh avanga a nih tur ang ni phak lo a awm theih awm e. Zaipawl tam zawkah conductor-te thlan hla sak ṭhin a ni tlangpui a. A kaihruaitu berin kal khat ringawta zaipawl a kaihhruai reng chuan a fuh ber lo thei. Sap hla lehlin kan sa thin a nih pawhin a tawk

hriat a ṭha. Hlapui kan zir dawn a nih pawhin zaipawl member tam dan azira thlan thiam a pawimawh. Tin, mipui nawlpuiin kan sak thiam ang hla zaipawlin kan sa fo te hi a ṭul chuan sak loh ngam a ṭha. Lengkhawm (khuannng hnih hla) phei chu zaipawlin sa lo ngam ila a ṭhat zawk a rinawm.

An ngaithla chak em...?

Thusawi thiam leh nung tak chu kan ngaithla leh chak ṭhin ang hian, zaipawla kan zai hi kohhran mipuiten an ngaithla chak ṭhin tur a ni. Zaipawl conductor-te leh member-te kan rilruin inzawt ṭheuh ila. Zaipawla kan zai hi kohhran mipuiten engtin nge an sawi ṭhin? 'An zai a nungin an thiam hle mai!' an ti ṭhin nge, 'An zai zawi leh ngawt ang!' an ti ṭhin zawk? Kohhran mipuite beisei ang leh kan zai an ngaihtlak chak ṭhin theihna turin tisa leh thlarau lamah inbuatsaih ṭhin ila. Kohhran mipuiten kan lakah beisei an neih tawh mang loh chuan kan zai aṭangin hlawkna an hmu thei lo vang a, malsawmna an dawng thei

hek lo vang. Hetiang a thlen loh nan leh kan zai aṭanga Pathian Thlarau Thianghlim pawlna, harh tharna leh malsawmna an dawn theih nan ṭawngṭaina nen i inbuatsaih ṭhin ang u.


A ngaihlathlute mil tawh

Zaipawl ṭha tak sawi tur an awm laiin a tam zawk mah hi chu 'style-a kal ral' an tih fiamthu hi kan ang mah mah em aw, a tih theih. Kan zai ṭan chauh va, a solfa sign *p-piano* (nem leh dim deuhva sak tur) tih inziak awm mang si loh laia dim taka kan sa ringawt mai ṭhin te, *f-forte* (ring taka sak tur) tih sign awmna laia a rin dan ngai renga kan zai zel mai ṭhin te, > *Sforzando* (tihzawih thut thut tur) tih pawh awm chuang si loh laia kan zai zawi thut thut ṭhin te hi a ngaihlathlute tam zawk hian a awmzia kan hre thiam lo tih conductor-te hian hre ṭhin se. Zaipawl changkanna leh a mawina tur emaw kan tih hi a ni ber em tih ngaihtuah a ṭul khawp mai. A solfa lam dikila, solfa sign a awm lo a nih chuan ring ṭha takin zai mai ṭhin ila, duh duh laia zai dim

leh zai uar hi ṭul lovah chuan insum tlang deuh ṭhin ila, chu chu zaipawl tingaihnawmtu leh tinungtu a nih zawk ngei a rinawm. Kan zai ngaihlathlute hriat thiam dan tur ngaihtuah chung a zaipawl kaihhrui thiam hi a ṭul tawh takzet niin a lang.

Rawngbawlna pawimawh

Zaipawl rawngbawlna hi a pawimawhin Pathian pawhin a hmang ṭhin hle tih kan hre ṭheuh awm e. Zaipawl zai aṭanga thlarau damna chang te, testimony ropui tak tak dawng te, pawl tharna chang ta te sawi tur ṭhahnem tak an awm tawh. Hetiang a nih mek lai hian tunlaia zaipawl zai kan ngaihlathlak tam zawk hi chu, mi dangte tana malsawmna thlentu nih lam aia mahni tana zai ni mai awm tak sawi tur kan awm em aw? Malsawmna thlentu tur ni si an zai zawh hun nghahhlelhawm tak tak kan awm fo zawk ta mai lo maw? Pathianin zaipawl rawngbawlna hi a la hmang duh reng ang tih ring chungin, zaipawla tel zawng zawngte hi i inbuatsaih ṭhin ang u.♦



KANTU

Thingdawl Hmar Veng Branch



Thingdawl Hmar Veng Branch KTP hi Thingdawl Bial KTP Branch panga zinga Branch upa ber niin kum 1971 khan din a ni a. Kum 2015 hian member 97 awmin mipa 64 leh hmeichhia 33 kan ni. Branch Committee member 18 leh Kohhran aiawh 1 nen thla tin Branch Committee neih thin a ni.

Branch tihchakna atan Johana, Jeremia, Josua Group-tea inthen a ni a, group tinte hian budget leh project-te neiin Branch-ah an chung lut thin a. Group-te hi Thawhtan zan inkhawm, fellowship leh hnatlangahte inelna neih thin niin heng bakah hian KTP Day-ah infiamna chi hrang hrang hmangin an inel thin a, a hmuhnewmin a hlimawm thin hle a ni. Group tinte hian mahni puala Group Nite hmang lovin kum tawp lamah

Joint Group Nite hman thin a ni.

Branch hnuaiah hian sub-committee siam niin - Music, Light & Sound, Evangelical Cell, Programme, Finance, Decoration & Ushering-ahte siamin Branch tihchak nan din a ni. Thawhtan zan inkhawm hi Sermon leh KTP kum puan thupui zir ho nan hman thin a ni a, Pathianni tlaiah fellowship neih thin niin Short Sermon, Bible Quiz, Hla zir hona leh member infuih nan te hman thin a ni. Heng bakah hian Evangelical Cell Sub-Committee ruahmannain Thawhtan zan leh kohhran inkhawm ban apiangin thupui neia tawngtai rual thin a ni.

Thawhtan zan inkhawm hi member-ten an ngai pawimawhin an phur thin hle a. Kohhran inkhawm hrang hrang member-ten an ngai

pawimawh leh zual nan branch huapin Nilai zan, Inrinni zan leh Pathianni chawhnu inkhawmahte inelna siam a ni. Tin, kumin chhunga branch project atan sound system tihchangtlun, General Conference kal nana sum dah leh Branch golden jubilee 201210-a lo thleng tur lawm nan bank-a sum dahte an nei. Tin, an project-te hi tihhlawhtlin tuma hma lak mek a ni. Kumin hian an Branch-in Kristian Ṭhalai chanchinbu copy 25 an la mek

a, missionary pakhat an chawm mek bawk.

Kumin chhung hian Branch-in inkhawm kal hma tih chu kum puan atan an hmang a. Kohhran Zaipawl hi Branch-in enkawlin kohhran hun pawimawh leh Bial Inkhawmpuiahte zai ṭhinin rawngbawlna nung taka kalpui mek a ni. Sum tuak dan tlangpui chu – Faith Promise, lei laih, sangha zawrh, huan sam, rawra chhut, hmun-phiah keh leh inhlawhna remchang apiang a ni. ♦



SYNOD CHOIR RAWNGBAWLNA

1. February 22, 2015 (Pathianni) chawhma khan Bible Society of India Annual General Meeting & Thanksgiving Service, Bawngkawn Kohhran Biak Inah an zai a, ṭum 1 din chhuahah hla 1 an rem.
2. February 22, 2015 (Pathianni) zanah Bethlehem Branch Golden Jubilee lawmna inkhawmah an zai a, vawi 2 din chhuahah hla 3 an rem. Director Pu R. Lalruatkiman CKTP aiawhin lawmpuina thu a sawi.
3. February 23, 2015 (Thawhtan) zan khan Chanmari Kohhran Diamond Jubilee lawmnaah an zai a, vawi 2 din chhuahah hla 4 an rem.
4. KTP Rorel Inkhawm vawi 6-na (February 27- March 1, 2015), Mission Veng Kohhran Biak Ina nghahah ṭum 5 din chhuahah hla 6 an rem.
5. March 8, 2015 khan Mizoram Presbyterian Kohhran Hmeichhe Inkhawmpui Lian vawi 46-na, Mamita nghahah ṭum 3 din chhuahah hla 4 an rem.
6. March 16, 2015 khan Chaltlang South Branch KTP 'Zaipawl Nite' programme-ah zaiin ṭum 2 din chhuahah hla 4 an rem a, Director Pu R. Lalruatkiman thuchah a sawi.

Keimahni



■ March 14-15, 2015 khan Kawnpui Venglai Branch Diamond Jubilee hmanpuiin Tv. R. Lalramnghaka (Finance Secy.) leh Pu Vanlalpeka te an kal a, Soloist Tv. Israela Pachuaubin a tawiawm. Pathianni chawhma inkhawmah Tv. R. Lalramnghakan thuchah a sawi.

■ March 14, 2015 khan Vairengte Bial Leadership Training neihpuiin Upa K. Rorelkima leh Pu K. Lalruatpuia an kal. Chawhma hunah Pu K. Lalruatpuian “Hruaitu nihna leh mawhphurhna” tih a sawi a, chawhnuah Upa K. Rorelkiman “Pawl inrelbawlna leh committee kalphung” tih a sawi. Bialtu Pastor leh Secretary-ten an tawiawm a, member 60 vel an tel thei.

■ March 19, 2015 khan Sihphir Branch KTTP Diamond Jubilee hmanpuiin Leader Rev. J. Lalremsiama a kal. Chawhma inkhawmah thuchah a sawi a, chawhnu lam atangin Finance Secretary Tv. R. Lalramnghakan a tawiawm a, Jubilee ruai an theh.

■ North Eastern Research Centre (NESRC), Guwahati buatsaihin March 10, 2015 khan I&PR Auditorium-ah “Workshop on the gender implications of Mizo customary law” neih a ni a. Synod lam atanga aiawh intir tura ngenna kan hmuh angin Dr. Julie Remsangpuii (Treasurer) a kal.

■ Mizoram Presbyterian Kohhran Hmeichhe Inkhawmpui Lian (March 5-8, 2015), Mamita neihah CKTP aiawhin Dr. Lalliansanga (Asst. Secretary) leh Pu Lalthangvunga Sailote an palai.

■ **YRC Hnatlang** : March 7 & 14, 2015 khan YRC hmun Falkland-a Gilead Special School thiah leh bungraw thiar hnatlang koh a ni a. Gilead Special School hi Bawngkawn Brigade-a an sikul hmun tharah sawn fel a ni ta. Hnatlang kal dan chu hetiang a ni:-

Ni 7.3.2015 (Inrinni)

- | | |
|-------------------|-----------------------|
| 1. Ramhlun - 53 | 2. Venghnuai - 37 |
| 3. Luangmual - 58 | 4. Zemabawk North - 9 |

- | | |
|---|-----------------------|
| 5. Tuikual - 35 | 6. Maubaw - 50 |
| 7. Mission Vengthlang - 50 | 8. CKTP Committee - 6 |
| 9. Chanmari Branch - (Theitui buaipute) | |
| TOTAL - 298 | |

Ni 14.3.2015 (Inrinni)

- | | |
|--|--------------------------|
| 1. Kulikawn - 86 | 2. Chanmari West - 33 |
| 3. Ramhlun Vengthar - 32 | 4. Dawrpui Vengthar - 85 |
| 5. Tlangnuam - 35 | 6. Zonuam - 42 |
| 7. Hlimen - 75 | 8. Chawnpui - 87 |
| 9. Hunthar - 43 | 10. CKTP Committee - 11 |
| 11. Bungkawn Vengthar Branch - 36 (Theitui buaipute) | |
| TOTAL - 565 | |

Ni 7.3.2015 (Inrinni)-a hnatlangah hnathawh a awlsam zawkn nan JCB pakhat hman a ni a. JCB hi Falkland Branch-in rawn thawhin, CKTP lamin a diesel man a tum thung a ni.

■YRC hmalakna dangte

1. Spastic Society-in office atana an hman thin in chhawng hnih chu Society lam sum harsatna avang leh anmahni rem tihna angin Rs. 1,00,000/-a khul sak an ni {CKTP 674:VII(4)}.
2. Committee hmasa lama kan lo pawm tawh, Spastic Society Rs. 5,00,000/-a puih chungchang chu, Society hi a wawi khatna atan Rs. 2,00,000/- pek phawt tha kan ti a. Tun dinhmuna sum kan pek tawh zat chu building khulna nen Rs. 3,00,000/- a ni (CKTP 673:V).

■SEC thu hriattirna

1. Rev. B. Sangthanga, Synod Secretary atengin, Synod 2014:59-in Kristian Thalai Pawl din kum a tihchianah, *'Kum 1954 February 16 a ni e,'* a tih avanga KTP Day hman zel dan tur chungchang OM-in SEC-a a thlen chu SEC 255:41-in *February 16 chu KTP Day-a hman tawh tur a ni e,* tia a rel thu hriattirna kan dawng.
2. Central KTP-in *"I Love Taiwan/EYEP programme"*-a mi pahnih intirh kan dilna chu SEC 255:42 chuan a remtih thu leh a kalna senso pawh tumsak a remtih thu hriattirna kan dawng baw.

■BRANCH DING THAR : Bungtlang South Bial chhungah February 1, 2015 khan Kristian Thalai Pawl, Saizawh East Branch din thar a nih thu report kan dawng. Member zat – mipa 14 leh hmeichhia 5, zavaiin 19 an ni.

CENTRAL K.T.P HRUAITUTE, 2014 – 2016

Office Bearers

Leader	:	Rev. J. Lalremsiama	9862669230
Asst. Leader	:	Pu Samuel Laldingiana	9436198740
Gen. Secretary	:	Upa Zonunmawia	9436152024
Asst. Secretary	:	Dr. Lalliansanga	9612241873
Treasurer	:	Dr. Julie Remsangpuii	9436142235
Fin. Secretary	:	Tv. R. Lalramnghaka	9436351374

Committee Members

Pu R. Lalruatkima	9436360571	T.Upa Richard B. Lalhriatpuia	8974287347
Pu C. Laldingiana	9436140834	Upa K. Rorelkima	9436153444
Pu Lalthangvunga Sailo	9862381275	Pu V. Lalrinmawia	9862563362
T. Upa T. Lalawmpuia	9436366519	Pu Ngurhmingiana	9436374104
Tv. Joseph Lalsangzuala	9436152063	Pu Vanlalpeka	9436153728
Pu Lalchhuanliana	9862364583	Pu K. Lalruatpuia	9862577177
Pu P.C. Biakmuanpuia	9436374833	Pu Zonunsanga Ralte	9402113038
T. Upa Lalmuanpuia	9436142398		

Ex-Officio Members

Rev. Lalrinmawia	—	Synod Moderator
Rev. B. Sangthanga	—	Secretary (Sr.)
Rev. P.C. Pachhunga	—	Executive Secretary, i/c KTP



Karbi Anglong Synod hawnna (March 29,2015)



Kantu: Thingdawl Hmarveng Branch

Postal Regn. no. MZR/81/2015-2017
RNI No. MIZMIZ/2009/29074



Kawnpui Venglai Branch Diamond Jubilee



Vairengte Bial Leadership Training



Sihphir Branch Diamond Jubilee

Printed & Published by Zonunmawia, Synod Office, Mission Veng on behalf of Kristian Thalai Fellowship
Edited by Lalmuanpuia and printed at Synod Press, Mission Veng, Aizawl, Mizoram, Copies - 40,000